

Deiseb ynghylch band eang cyflym iawn

Y Pwyllgor Deisebau | 15 Tachwedd 2016

Petitions Committee | 15 November 2016

Briff ymchwil:

Rhif y ddeiseb: P-05-720

Teitl y ddeiseb: Deiseb Cyngor Cymuned Hirwaun a Phenderyn i Osod Band Eang Ffibr Opteg

Testun y ddeiseb: Rydym ni, trigolion Penderyn, wedi llofnodi'r ddeiseb isod i fynegi'n dymuniad i gael band eang opteg ffibr yn ein pentref. Byddai'r gwasanaeth hwn yn trawsnewid ein cymuned, yn ein helpu ni fel defnyddwyr i ddefnyddio'r rhyngwrwyd yn gymdeithasol yn ogystal â'r rhai sy'n gweithio yn y pentref naill ai mewn busnesau lleol neu sy'n gweithio gartref.

Cefndir a chamau gweithredu Llywodraeth Cymru

Mae BT wrthi'n cyflwyno band eang cyflym iawn ledled Cymru drwy brosiect Cyflymu Cymru Llywodraeth Cymru. Ariennir y prosiect gan Lywodraeth Cymru, Llywodraeth y DU, yr UE a buddsoddiad BT ei hun. Ym mis Gorffennaf 2015, cyhoeddodd Llywodraeth Cymru estyniad i'r prosiect hwn i gwmpasu 42,000 o safleoedd ychwanegol: o ganlyniad i hyn, estynnwyd dyddiad cau'r rhaglen i haf 2017.


Mae Llywodraeth Cymru yn cynnal dau gynllun arall i wella argaeledd band eang:

- [Allwedd Band Eang Cymru](#): mae grantiau o hyd at £800 ar gael lle na all y safle gael mynediad at fand eang cyflym ar hyn o bryd;
- [Y Cynllun Taleb Gwibgyswllt](#): mae grantiau o hyd at £10,000 ar gael i ariannu (neu ariannu'n rhannol) costau gosod cysylltiadau cyflym iawn newydd i fusnesau yng Nghymru

Mae gan Lywodraeth Cymru raglen manteisio ar fand eang cyflym iawn pum mlynedd gwerth £12.5 miliwn er mwyn helpu busnesau i wneud y mwyaf o'r cyfleoedd a gynigir gan fand eang cyflym iawn. Caiff hyn ei ariannu gan Lywodraeth Cymru, yr UE, awdurdodau lleol a ffynonellau academaidd a phreifat.

Mae [data diweddaraf Ofcom](#) ar gyfer gwasanaeth band eang (Mehefin 2015) yn dangos, ers 2014 mae gwasanaethau band eang cyflym iawn wedi cynyddu'n gyflymach yng Nghymru nag yn unrhyw wlad arall yn y DU:

Figure 1: Coverage of superfast services has improved



Source: Ofcom analysis of operator data

Camau gweithredu Cynulliad Cenedlaethol Cymru

Ar 2 Tachwedd 2016, cynhaliodd y Ceidwadwyr Cymreig [ddadl yn y Cyfarfod Llawn](#) ar fynediad i fand eang. Dyma'r cynnig diwygiedig fel y'i pasiwyd:

Cynnig bod Cynulliad Cenedlaethol Cymru:

1. Yn croesawu'r cynnydd sydd wedi'i gyflawni o safbwynt gweithredu cynllun Cyflymu Cymru, sef cynllun sydd wedi galluogi dros 610,000 o eiddo ar draws Cymru i fanteisio ar fand eang cyflym ac a fydd yn galluogi 100,000 o safleoedd ychwanegol i fanteisio arno erbyn i'r prosiect ddod i ben yn 2017.
2. Yn nodi cynnydd Allwedd Band Eang Cymru a'r prosiect a wnaeth ei ragflaenu sydd wedi galluogi dros 6,500 o eiddo ar draws Cymru i fanteisio ar fand eang drwy wahanol dechnolegau arloesol.
3. Yn cydnabod pwysigrwydd band eang cyflym a chysylltedd digidol i fusnesau, cymunedau a'r economi ym mhob rhan o Gymru ac yn nodi ymrwymiad y Rhaglen Lywodraethu i gynnig band eang dibynadwy a chyflym i bob eiddo yng Nghymru.
4. Yn nodi bwriad Llywodraeth Cymru i:
 - (a) cydweithio ag Ofcom, Llywodraeth y DU a gweithredwyr y rhwydwaith er mwyn cynnig mynediad at fand eang cyflym a signal ffonau symudol ar draws Cymru;
 - (b) diwygio Hawliau Datblygu a Ganiateir o fewn y system gynllunio er mwyn hybu buddsoddiad yn y seilwaith telathrebu ac adleoli'r rhwydwaith;
 - (c) pwyso a mesur yr hyn y mae Llywodraeth yr Alban wedi'i gyflawni drwy ei chynllun gweithredu ffonau symudol wrth ddatblygu cynigion yng Nghymru; a
 - (d) cyhoeddi rhagor o wybodaeth am estyn mynediad at fand eang dibynadwy a chyflym i bob eiddo yng Nghymru.

Gwneir pob ymdrech i sicrhau bod y wybodaeth yn y papur briffio hwn yn gywir adeg ei gyhoeddi. Dylai darllenwyr fod yn ymwybodol, fodd bynnag, nad yw'r papurau briffio hyn

yn cael eu diweddarau na'u diwygio fel arall o reidrwydd i adlewyrchu newidiadau dilynol.